

# 幼學瓊林

## 年齡

### 【原文】

不凡之子，必異其生；大德之人，必得其壽。生申初度，賀人壽誕之稱；遐算修齡，祝人壽考之謂。

洗三曰湯餅之會，試周曰晬盤之期。男誕曰顯弧令旦，女誕曰設帨良辰。

賀人生子，嵩岳降神；自謙生女，緩急非益。曰夢熊，曰弄璋，生男之兆；曰夢虺，曰弄瓦，生女之征。

姜嫄履巨跡而娠，簡狄吞黿卵而孕。鄭姬芳蘭葉吉夢，桓公英物試啼聲。

麟吐玉書，天啓尼山聖瑞；燕投懷內，夢征唐室人豪。李老君八十年而降，道號猶龍；漢太子十四月而生，門名堯母。

晚年得子，老蚌生珠；皤首登科，龍頭有屬。賀男壽曰南極星輝，賀女壽曰中天婺彩。

松筠節操，羨風霜耐久；桑榆暮景，慮歲月之無多。矍鑠人稱強健，老朽自歡衰頹。

黃髮兒齒，眉壽之征；潦倒龍鍾，暮年之狀，日月其邁，徒自傷悲；青春幾何，問人壽算。

行年五十，當知四十九年之非；在世百歲，那有三萬六千之樂。故有上中下壽之分，更有耄耋期頤之號。

自就傳而舞勺舞象，固可畏之後生；由杖鄉而杖國杖朝，尤當敬其老者。

## 製作

### 【原文】

上古之世，政尚結繩；蒼頡挺生，制爲文字。河馬負圖，羲畫八卦；洛龜呈瑞，禹列九疇。

刻漏挈壺所司，甲子大撓所造。算數作於隸首，律呂制自伶倫。

甲冑舟車，俱軒轅之創始；權衡度量，悉黃帝之立規。章亥紀步數以定極，伯鯨築城郭以衛民。太昊造網罟以佃漁，少昊作弧矢以戰伐。制耒耜，興陶冶，皆由炎帝；造琴瑟，作杵臼，乃自羲皇。

冠裳之制，至有態而大備；蠶桑之利，由元妃而始興。神農嘗百草，醫藥有方；後稷播五穀，粒食攸賴。

鑽木取火，而烹飪初興；構木爲巢，而宮室始創。夏王鑄鼎，以象九州；漢帝建寺，以崇佛教。

指南車創自姬周，羅盤是其遺制；渾天儀肇於炎漢，歷家始有所宗。秦始皇築萬里長城，魏文帝敘九品官秩。

蕭相國造千秋律令，叔孫通定百職朝儀。大篆小篆，各異其名；圍棋象棋，各別其用。

詩賦遴纒，李唐之盛典；文章取士，趙宋之成規。經書印自馮道；通鑿編自溫公。雁塔載於佛經，梨園著於唐史。

恬筆倫紙，固文房寶玩；和弓垂矢，亦武庫良材。凡古昔之前型，爲今時之利用。

## -文史

### 【原文】

名士纔儲八斗；鴻儒學富五車。三墳五典，古聖之真傳；七緯九經，先民之秘要。

尚書皆虞夏商周之政事，周易乃羲文姬孔之精微。二戴俱刪禮記，故曰戴禮；二毛皆注詩經，故曰毛詩。

孔聖修春秋，因獲麒麟而絕筆；太公論韜略，悉假虎豹以名篇。縹緗黃卷，總謂經書；雁帛魚書，通稱簡札。

錦心繡口，李供奉之詞章；鐵畫銀鉤，王右軍之字法。雕蟲謙藝學之卑，倚馬誇文思之捷。

別來三日，便當刮目相看；面壁九年，方能有此神悟。五鳳譽其精奇，七步稱其敏速。

詩之工者，壓倒元白；纔之高者，媲美班揚，晁大夫以多智而號智囊；王仁裕以能詩而稱詩窖。自古詩人推李杜，至今字學仰 王。陽春白雪，難和難賡；萬選青錢，屢試屢中。

文賦之雄，可驚神而泣鬼；音詞之妙，每遏雲而繞梁。涉獵不精，乃好博之弊；咿唔不輟，是勤讀之功。

以賂勾文，謂之潤筆；因書得粟，謂之舌耕。文不加點，機杼自成一家；字無空設，詞意俱從百煉。襍線之才甚短，記問之學必膚。曳白乃應試無文，殺青亦風流罪過。裁詩之苦，費其推敲；曠學之弊，在乎作輟。

文章浮薄，何殊月露風雲；典籍儲藏，皆在蘭臺石室。祖龍無道，焚書坑儒；唐帝右文，開科取士。

依樣葫蘆，正謂行文之剿襲；潦草塞責，不求下語之精詳。異端左道，邪說橫流；肄業藏修，讀書攻苦。

作文曰染翰操觚，請業曰執經問難。求文曰乞如椽筆，譽美曰是大方家。

共羨佳章，洛陽紙貴；喜於答問，明鏡不疲。藏書稱為鄴架，嗜學號為書淫。

樂天七月，便識之無；長吉七歲，作高軒過。開卷有益，賢君之要語；不學無術，權相之為人。劉向校書芸閣，丙夜燃藜；孫康執卷茅簷，隆冬映雪。李白夢筆生花，文藻大進；揚子夢口吐鳳，詞賦愈奇。

李守素號為人物誌，虞世南呼為行秘書。韓公文望尊隆，泰山北斗，程子涵養潤澤粹，良玉精金。含英咀華，咳唾隨風生珠玉；包今統古，賦詩擲地作金聲。抄書至數十篋，無非向學之勤；徒居載三十車，皆雲稽古之力。

是以慕丁顛之義訓，聚書必興；更宜守杜暹之良規，鬻書不孝。

## 藝術

### 【原文】

醫士業擅岐黃，稱爲國手；地師技精青烏，號曰堪輿。盧醫扁鵲，古之神醫；王墨鄭虔，古之名畫。

郭景純得青囊秘術，孫思邈傳龍府仙方。善卜乃君平詹尹之流；善相爲唐舉子卿之亞。

推命謂之風角，繪畫謂之丹青。大風鑿相士之稱；大工師匠人之號。

王良造父，馭駕最精；東方淳於，滑稽無匹。稱卜筮者，世之鬼谷；稱記怪者，鬼之董狐。

稱誦日之人曰太史，稱書算之士曰掌文。善博者喝雉呼盧。善射者穿楊貫虱。

擣蒲之戲，乃言雙陸；橘中之樂，是謂奕棋。陳平作傀儡以解圍，孔明造牛馬以運米。

僧繇點龍睛而破壁，公輸削木鳶而高飛。雖奇技似無益於人，而百藝期有濟於用。

## -貧富

### 【原文】

命之修短有數，人之富貴在天。君子安貧，達人知命。貫朽粟陳，稱羨多財之謂；紫標黃榜，封記府庫之名。

貪愛財貨，謂之錢愚；喜置田產，謂之地癖。守錢虜譏不能散；落魄子嘆其無依。

貧無立錐，富連阡陌。室如懸磬，言其空匱；家無儋石，言其赤貧。

絕糧曰在陳，多財曰錢癖。富足曰殷實，偃蹇曰數奇。濟急如決水以活鮒魚，乞糧則登山而呼庚癸。

家徒壁立，司馬之貧；屢?爲炊，百里之厄。鵠面菜色，窮民無告之形，易子析骸，軍士乏糧之慘。

餓死留君臣之義，千古夷齊；貲財敵王公之富，一時陶倚。殺妓侑灑，豪橫非常；食費萬錢，奢華太過。

二月買絲，五月糶谷，洵爲剜肉醫瘡；三年餘一，九年餘三，庶遇凶荒有備。貧士腸習藜藿，富人口厭珍饈。

蠟代薪，飴沃釜，何其侈也；甑生塵，釜生魚，不亦廉乎。捉襟肘見，納履踵決，貧者士之常；數米而飲，稱薪而爨，吝則實可鄙。

總之，飽德之士，不願膏粱；聞譽既施，奚須文繡。

## 訟獄

### 【原文】

人惟不平則鳴，世以無訟爲貴。上果哀矜，喜見桁楊雨潤；下無冤枉，欣看肺石風清。

誰謂囹圄爲福堂？須知畫地可立獄。構訟則雀角相爭，訴冤則覆盆得雪。

獄門畫狴犴之形，以其能守；聽訟在棘木之下，貴乎不冤。鄉亭有岸，朝廷有獄，下之人誰敢作奸犯科；死不可生，刑不可贖，上之人自當原情定罪。

夏之獄名鈞臺，商之獄名羑裡。桎梏所以械系，縲曳所以拘繫。兩爭不釋，鷸蚌相持；累及無辜，池魚被害。

下車泣罪，夏王深痛其民；入瓮承招，唐史自作之孽。紛爭謂之健訟，訐告謂之株連。排解謂之釋紛，栽冤謂之嫁禍。

徒配有城旦之名，流戍即充軍之謂。三尺乃朝廷之法，三木亦罪犯之刑。

古之五刑：墨，劓，剕，宮，大辟；清之律例：笞，杖，徒，流，死罪。削木爲吏，上古之淳風安在；縱囚歸省，唐宗之盛德可嘉。

花落庭閑，草生獄靜，何公治民之簡；吏立冰上，人行鏡中，盧君折獄之清。雖曰治亂之藥石，刑罰爲重；要知興平之梁肉，德教爲先。

## -凶喪

### 【原文】

福壽康寧，人所同欲；死亡疾病，世不能無。問疾曰玉體違和，自謙曰適沾微恙。偶爲造化小兒所苦，豈是實沈臺駘爲祟。

病在膏肓曰弗瘳，喜其勿樂曰無恙。臥病爲采薪之憂，腹疾爲河魚之患。瘡不病君子，病君子乃爲瘡耳；卜所以決疑，既不疑又何卜哉？

謝安夢雞，悟太歲之在酉；楚王吞蛭，羨厚德之及人。屬續易簣，言人將死；鬼錄物故，謂人已亡。

親死曰丁憂，又曰丁艱；居喪曰守制，又曰讀禮。在床爲屍，在棺爲柩；報孝爲訃，慰孝爲唁。

寢苫枕塊，哀父母之傾逝，節哀順變，勸孝子之惜身。曰崩、曰薨、曰卒、尊卑各異其稱，曰死、曰夭、曰殤，修短各因其分。

孤子哀子，居喪自痛之詞；失怙失恃，父母俱亡之謂。父死曰考，考者成也；母死曰妣，妣者媿也。自泣血稽顙之外，又有大祥小祥之殊；自斬衰齊衰之下，又有大功小功之別。

三月之服爲緦麻，三年將滿爲禫服。王父歿則嫡孫杖期，長子亡則嫡孫承重。

死者之器曰明器，孝子之杖曰哀杖，財物助喪謂之賻，車馬助喪謂之贈。以衣殮身謂之襚，以玉實口謂之琯。

送喪曰執紼，舉柩曰駕輻。卜地曰牛眠，封土曰馬鬣。墓石原名翁仲，丹旒今號銘旌。挽歌始自田橫，墓誌創於傅奕。

生墳曰壽藏，死墓曰佳城；安葬曰瘞玉，吊奠曰束芻。窀穸夜臺，告窆之謂；禘禘烝嘗，致祭之名。

飲柩捲而口澤如存，讀父書而手澤未泯。高子恙悲親而泣血，卜子夏哭子而喪明。

王裒痛父，門人廢詩；王修哭母，里人輟社。樹靜而風不息，皋魚增感，椎牛不若雞豚，曾子興思。

故爲人子者，當知木本水源；念爾祖者，更宜慎終追遠。

## 釋道

### 【原文】

如來爲佛家之祖；老君爲道教之宗。  
驚嶺祇園，皆雲佛國；交梨火棗總是仙丹。  
沙門稱釋，始於晉之道安；中國有佛，肇於漢之明帝。  
彭祖八百遐齡，旌陽一家昇舉。  
波羅猶雲彼岸，紫府即是仙宮。  
曰上方，曰梵刹，俱爲選佛之場；曰紺宇，曰珠宮，悉是遊僊之境。  
伊蒲饌可以齋僧。青精飯可以延壽。  
香積廚，僧家所饌；玉麟脯，仙子所餐。  
履葦渡江，咒蓮生鉢，佛氏玄機；喫酒滅火，吐飯成蜂，仙家妙用。  
吳猛揮扇，畫江成路；麻姑撒米，遍地丹砂。  
導引胎息，道士之修持；飛錫坐禪，僧人之行止。  
僧家禮拜曰和南，道家禮拜曰稽首。曰圓寂，曰茶毗，悲溜流之已故；曰僊遊，曰屍解，悼羽士之雲亡。  
女巫男覲，自古攸分；男僧女尼，從來有別。  
羽客黃冠，皆稱道士；上人德士，並美高僧。  
檀越檀那，僧家之稱施主；燒丹煉汞，道士之學神仙。  
和尚自謙，爲空桑子；道士誦經，謂步虛聲。  
菩者，普也；薩者，濟也；故有菩薩之號。水行惟龍，陸行惟象，故有龍象之稱。  
儒謂之世，釋謂之劫，道謂之塵，言俗緣之未脫；儒雲致一，釋雲三昧，道雲貞一，知奧義之無窮。  
達摩隻履西歸，王令雙鳧下降。  
凝神關谷，仙家服氣煉形；不生不滅，釋氏明心見性。  
談經入妙，可使岩石點頭，天花飛墜；煉丹既成，能令龍虎降伏，雞犬俱昇。  
藏世界於一粟，佛力何其大嶼！貯乾坤於一壺，道法何其玄也！  
無鬼論作於阮瞻；搜神記撰於乾寶。  
顏淵，子夏。死爲地下修文；韓相，寇公，歿作閻浮王者。  
至若水神曰天吳，旱鬼曰旱魃。  
魑魅魍魎，山川之崇；神荼郁壘，守禦之神。  
仕途偃蹇，路鬼不免揶揄；心地光明，吉神自爲呵護。



## -身體

### 【原文】

百體惟血肉之軀，五官有貴賤之別。  
帝堯眉分八采，大舜目有重瞳，神禹之耳三漏，成湯之臂四肘。  
周文王龍顏而虎眉，漢高祖斗胸而隆准。倉帝之胸四乳，孔聖之頂若圩。  
姬公反握，作相於周；重耳駢脅，興霸於晉。此皆古聖之英姿，洵是不凡之貴品。  
至若髮膚不敢毀傷，守身為大；待人須當巽順，唾面自乾。  
讒言誹謗，金可鑠而骨可銷；虐政誅求，敲其膚而吸其髓。  
受人牽制曰掣肘，不知羞愧曰厚顏，共話衷曲曰談心，擅生是非曰鼓舌。  
怒髮衝冠，蘭生之英氣勃勃；炙手可熱，崔氏之貴勢炎炎。  
民肥君瘦，唐宗盛德可嘉。口蜜腹刀，李相奸邪最著。  
趙子龍一身是膽，周靈王生而有髭。  
注醋囚鼻，酷吏肆威；加足帝腹，客星犯座。  
久不屈茲膝，強鎮自爾寒心；不為米折腰，高士幡然歸隱。  
纖指有如春荀，媚眼正似秋波。  
肩聳玉樓，目澄銀海；淚垂玉?，額表珠庭。  
歇擔謂之息肩，不服謂之強項。  
丁謂為人拂須，何其謔也；彭樂截腸決戰，不亦勇乎？  
剜肉醫瘡，權濟目前之厄；傷胸捫足，計安眾士之心。  
張子房躡足附耳，黃眉翁洗髓伐毛。  
契丹避黑面大王，東坡頌鐵肝御史。  
土木形骸，容無藻飾；心腸鐵石，性本堅剛。  
會晤曰得挹芝眉，邀請曰敢攀玉趾。  
侏儒，詭人短小；魁梧，譽人英奇。龍章鳳姿，廊廟之彥；獐頭鼠目，草野之夫。  
恐懼則畏首畏尾，感佩則刻骨銘心。  
貌丑曰不颺，貌美曰冠玉，耳龍曰重聽，足跛曰蹠跚。  
期期艾艾，口訥之稱；捷捷幡幡，贊言之謂。  
可羨者小心翼翼，可鄙者讒口囁囁。腰細謂之柳腰，身小謂之雞肋。  
笑人缺齒，狗竇胡為大開；謂人疑心，首鼠從茲僨事。  
胸中冰炭，言人事之參差；皮裡陽秋，謂一心之褒貶。  
唇亡齒寒，相依表裡；足上首下，倒置親尊卑。所為得意，果然吐氣揚眉；待人以誠，恍若推心置腹。  
忙迫則方寸已亂，沈醉則玉山將頹。睡曰黑甜，臥曰息偃。  
童蒙乳臭，謂年少之無知；折臂折肱，謂醫家之老練。  
西子捧心而愈媚，楊妃露乳而增妍。肉眼不識英賢，青睛自然聰慧。  
脅肩無非媚態，諂笑何異奴顏。義士丹心，期於報國；婦人長舌，實為厲階。  
事之遂心曰如願，事之可愧曰腆顏，人之多言者曰饒舌，物之堪食者曰可口。  
澤及枯骨，頌其仁慈；包藏禍心，戒其奸慝。

賢君療臣之病，親剪其須；忠臣罵賊不屈，被斷其舌。

不較橫逆，曰置之度外；洞悉情形，曰已在目中。口有雌黃，王夷甫善談玄理；眼分青白，阮 宗厚待嘉賓。

擲果盈車，因丰姿之可愛；投石滿載，為醜陋之堪憎。

事之可怪者，婦女生須；世所駭聞者，丈夫孕子。燃眉之急，求人之相助；噬臍何及，悔事之無成。肥瘠漠不相關，秦人之視越；頭皮這回斷送，楊婦之送夫。

無功食祿，謂之尸位素餐；譎劣無能，謂之行屍走肉。

一息尚存，此志不容少懈；十手所指，吾心安可自欺。

## -宮室

### 【原文】

洪荒之世，野處穴居；以避毒害；有巢以後，上棟下宇，以奠民生。  
竹苞松茂，洵制度之得宜；鳥革翬飛，亦創建之盡善。

前殿謂之紫宸，禁門謂之青瑣；宰相職居黃閣，百官奏對丹墀。木天署，  
學士所居；紫薇閣，中書所蒞。

金馬玉堂，翰林清貴；柏臺烏府，御史威嚴。

布政稱為藩府，按察系是臬司。

安仁之令河陽，人稱花縣；子賤之治單父，世號琴堂。

朱門潭府，仕宦之家；白屋衡門，隱逸之宅。

喜氣遙臨，門蘭藹瑞；高車過訪，蓬華生輝。

書言肯構肯堂，禮稱美輪美奐。土木方興曰經始，創（勑）造已畢曰落  
成。樓高可以摘星，室小僅堪容膝。

寇公庭外，只可栽花；李相?前，僅容旋馬。

稱人曰燕賀，自謙曰蝸居。民家曰閭閻，貴族稱閭閻。朝廷曰魏闕，書館  
曰芸窗。館驛曰郵亭，客邸曰逆旅。

成均闕雍，皆國學之號；黉宮庠序；乃鄉學之名。規制崇隆，四香分閣；  
文章妙麗，五鳳名樓。善忌者比之徒宅忘妻；不謹者比之開門揖盜。何樓多市  
偽之物，壟斷即專利之人。

華門圭竇，貧士之居；瓮牖繩樞，窶人之室。

必若寇萊公，真是北門鎖鑰；倘非檀道濟，誰為萬里長城。

## -器用

### 【原文】

凡一人之所需，必百工斯爲備。雖則各適其用，而亦每異其名。

管城子，中書君，筆號不一；石虛中、即墨侯，硯名亦殊。

墨爲松使者，紙號楮先生；銀光玉版；俱是紙名；九子隴麋，皆爲墨號；金管，銀管，斑管，筆床自分三品；活眼，淚眼，死眼，硯石可值千金。朋友相資，謂之筆硯同事，師生相繼，謂之衣鉢真傳。

篤志業儒，磨穿鐵硯，棄文就武，安用毛錐。

劍有幹將鏌 之名，扇有仁風便面之號。

小舟名曰蚱蜢，巨艦號曰臙腫。金根是皇后之車，菱花是婦人之鏡。鑿落原爲酒器，參差乃是簫名。

刻舟求劍，固而不通；膠柱鼓瑟，物而不化。

斗筲言其器小，棟梁謂是大材。鉛刀無一割之利，強弓有六百石之名。

杖以鳩形，因其不噎；鑰同魚目，取其常醒。

兜鍪系是頭盔，叵羅乃爲飲具，短劍稱爲匕首，氈毼即是氈毯。

鼠須筆，風字硯，供王右軍之書。鸕 杓，鸚鵡杯，飲李太白之酒。

琴名綠綺焦桐，弓號烏號繁弱。香爐謂之寶鴨，燭檯謂之燭奴。龍涎雞舌，香之美名；鷓首鴨頭，船之別號。

壽光是妝臺無塵之鏡；長明是梵堂不滅之燈。桔槔即田家之水車，襜褕乃農夫之雨具。

夜可擊，晝可炊，軍中刁斗；雲漢熱，北風寒，室裡畫圖。

勉人發憤，猛著祖鞭；求人恕罪，幸開湯網。

拔幟立幟，淮陰之計甚奇；得弓失弓，楚王所見未大。

董安於佩弦以自勉，西門豹佩韋以自寬。

孟敏墮甑不顧，楚妃守符而亡。溫嶠然犀，照見水族；秦皇懸鏡，洞矚邪心。

車載斗量，庸流不可勝數；南金東箭，奇材實是堪誇。

傳檄而定，極言敵之可敗； 迎刃而解，甚言事之易成。

是故以銅爲鑒，僅可以整衣冠；必也以古爲鑒，斯可以知興廢。

## -衣飾

### 【原文】

冠爲元服，衣是身章。曰冕曰弁，皆冠之號；曰舄曰屣，俱履之名。士人初冠有三加，上公命服有九錫。

簪纓黼黻，仕宦之榮；縫掖章甫，貧儒之飾。

布衣即白丁之謂，青衿乃士子之稱。葛屨履霜，諛儉嗇之過甚；綠衣黃裡，譏貴賤之失倫。

上服曰衣，下服曰裳；衣前曰襟，衣後曰裾。

華服曰綺紈，敝衣曰藍縷，兒衣曰襁褓，童飾曰弁髦。

不序尊卑，如以冠苴履；不歸鄉里，如衣錦夜行。狐裘三十年，儉推晏子；錦幃五十里，富羨石崇。

春申君珠履三千，牛丞相金釵十二。千金之裘，非一狐之腋；羅綺之輩，豈養蠶之人。貴者重裊迭褥，貧者短褐不完。

公孫布被十年，子夏鶉衣百結。京洛化淄衣，騷人琢句；山門留玉帶，學士參禪。

鸕鶿裘，白鶴氅，名士風流；忍辱鎧，無垢衣，空門寂寞。

三河領袖，誇裴駿之超群；南州冠冕，譽龐統之邁眾。

聖主製衣裳，以命有德；賢君藏敝，以待有功。晉侯衣不重裘，唐宗服經三浣。

衣履不敝，不肯更爲，世稱其儉；衣不經新，何由得故，人服其廉。

姜氏可風，兄弟每宵同大被；王章未遇，夫妻相對泣牛衣。

羊叔子緩帶輕裘，江東儒將；陶淵明葛巾野服，陸地神仙。

故曰服之不衷，身之災也；亦云敝而無憾，志獨超歟。

## 飲食

### 【原文】

甘脆肥膿，無非腐腸之藥物；羹藜含糗，難語太牢之滋味。盛饌曰珍饈，御膳曰玉食。

美酒曰青州從事，惡酒曰平原督郵。

雲液香醪，皆為酒號；龍團雀舌，俱是茶名。

待客禮衰，曰醴酒不設；款賓意薄，曰脫粟相留。竹葉青，真珠紅，總為旨酒；鴨頭綠，鵝兒黃，悉是醇醪。

日給三升，東皋子之愛酒；風生七椀，玉川子之嗜茶。茶曰先春，又曰瑞草；米曰白粲，又曰長腰。

待客驚雷莢，供佛紫茸香，溜流清況；呼為釣詩鉤，亦號掃愁帚，騷客閑情。

太羹玄酒，亦可薦馨香；塵飯塗羹，奚能充飢餓。酒系杜康所造，腐乃淮南所為。魚號為水梭花，雞呼為穿籬菜。

羔酒呼烏，田家自勞，含哺鼓腹，盛世民風。貪食之人曰徒鋪啜；不敬之食曰嗟來食。

多食不厭，是為饕餮之徒；見食垂涎，似有欲炙之色。

謂人賜食曰飽德，謂人醒酒曰解醒。半菽不飽，言飲食之艱；每飯不忘，言思念之切。

謝人曰擾兵廚，自謙曰設魯酒。白飯青芻，接待僕馬之厚；炊金爨玉，款留賓客之豐。

貧家待客，何妨抹月披風；冬月邀賓，亦可敲冰煮茗。

宰肉甚均，陳平見重；戛羹示盡，丘嫂心憎。晉人為吏部而盜酒，逸興太豪；良將愛士卒而投醪，戰氣百倍。

懲羹吹齏，謂人鑒前警後；酒囊飯袋，謂人少學多餐。隱逸之士，漱石而枕流；沈湎之夫，藉糟而枕曲。

昏庸如桀紂，胡為乎酒池肉林；苦學若希文，正不妨斷齏畫粥。

## 珍寶

### 【原文】

山澤之精英，每泄爲至寶；乾坤之瑞氣，恆結爲奇珍。故玉足以庇嘉谷，珠足以御火災。

魚目豈可混珠，碲碲奚能亂玉；黃金生於麗水，白銀出自朱提。曰孔方，曰家兄，俱爲錢號；曰青蚨，曰鵝眼，亦是錢名。

可貴者，明月夜光之珠；可珍者，璠瑜琬琰之玉。

宋人以燕石爲玉，什襲而藏；楚王以璞玉爲石，兩刖其足。

魏侯之珠，光照十二乘；和氏之璧，價重十五城。鮫人泣淚成珠，宋人削玉爲楮。賢乃國家之寶，儒爲席上之珍。

賢主聘士，束帛加璧；真儒抱道，懷瑾握瑜。雍伯種玉，而得美婦；太公釣璜，而遇明君。

剖腹藏珠，因貪財而殞命；纏頭用錦，乃助舞以添嬌。孟嘗廉潔，合浦還珠；相如勇忠，秦廷完璧。

釵作燕飛，漢宮之異事；錢成蝶舞，唐庫之奇聞。多錢固有神通，營財乃爲鬼笑。

以此致彼，謂之拋磚引玉；以賤失貴，謂之買櫝還珠。賢否莫辨，謂之玉石俱焚；貪吝無厭，謂之輜珠必算。

崔烈買官，人特嫌其銅臭；蘇秦拜相，嫂亦畏其金多。天雨錢，以助態哀之葬；天雨金，以濟仲儒之貧。楊公以養廉而辭金，唐帝以懲貪而賜絹。雖曰匹夫，不可懷璧，然而人生誰不需財。床頭金盡，遂致壯士無顏；囊內錢空，未免阮郎羞澀。

## 花木

### 【原文】

植物非一，有萬卉之稱；穀種甚多，有百谷之號。如茨如梁，謂禾稼之蕃；惟夭惟喬，謂草木之茂。

蓮花比之君子，海棠號曰神仙。國色天香，詠牡丹之富貴；冰肌玉骨，賦梅萼之清奇。蘭爲王者之香，菊有隱逸之趣。竹稱君子，松號大夫。

萱草可以宜男，屈軼自能指佞。篔簹乃竹之類；木樨，亦桂之名。明日黃花，過時之物；歲寒松柏，勁節之稱。

樗櫟無用之材，楸楠勝任之木。玉版，筍之異號；蹲鴟，芋之別名。瓜田李下，事避嫌疑；秋菊春桃，時來遲早。南枝先，北枝後，庾嶺梅舒；朔而生，望而落，堯階莫茁。

苾芻背陰向陽，比僧人之有德；木槿朝開暮落，喻榮華之不長。芒刺在背，言人恐懼不安；熏蕕異氣，謂人賢否有別。桃李雖無言，而下自成蹊；苦李生道旁，則爲人所棄。

老夫娶婦，枯楊生稊；國家進賢，拔茅連茹。蒲柳未秋而先槁；薑桂愈老而益辛。王者之師，勢如竹破；七雄之國，地若瓜分。苻堅疑，草木皆爲敵兵；索靖艱，銅駝會在荆棘。王家手植三槐；竇氏人稱五桂。

鉏耨觸槐，不忍賊民之主；越王嘗蓼，必欲報吳之仇。歐陽母畫荻教子，誰不稱賢；廉將軍負荊請罪，善能悔過。

彌子以餘桃啖君；商君欲徙木立信。賣李鑽核，王戎之鄙吝；剪桐封弟，天子無戲言。

齊以二桃殺三士，唐謂蓮花似六郎。啖蔗漸入佳境，蒸梨便失本真。煮豆燃萁，比兄之殘弟；砍竹遮荀，棄舊而憐新。

元素致江南之柑，吳剛伐月中之桂。濟友法堯夫之助麥，敬君效野人之獻芹。

冒雨剪韭，款友之情甚殷；踏雪尋梅，自娛之興最雅。商王能修君德，不畏詳桑；萊公有惠民生，再生枯竹。

蟠桃之開花結子，每三千年；大椿之爲春爲秋，亦八千歲。去稂莠，正所以植嘉禾；沃枝葉，則不如培根本。故世路之榛蕪當剔，而人心之茅塞須開。



## -鳥獸

### 【原文】

龍爲鱗蟲之長，虎乃諸獸之王。麟鳳龜龍，謂之四靈；犬豕與雞，謂之三物。

驂騮駉駉，皆馬之號；太牢大武，乃牛之稱。羊曰柔毛，又曰長髯主簿；豕雲剛鬣，又雲烏喙將軍。

鵝名舒雁，鴨號家鳧；雞有五德，鳳備九苞；家狗烏圓，貓之美譽；韓盧楚獷，犬之別名。

麒麟騶虞，俱爲好仁之獸；螟螣蠹賊，皆是害稻之蟲。無腸公子，螃蟹之名；綠衣使者，鸚鵡之號。

狐假虎威，謂藉勢而爲惡；養虎貽患，謂留禍以累身。猶豫，喻人之多疑；狼狽，比人之相倚。勝負未分，不知鹿死誰手；基業易主，正如燕入他家。雁到南方，先至爲主，後至爲賓；雉名陳寶，得雄則王，得雌則霸。

刻鵠類鶩，爲學而未成；畫虎類犬，弄巧而反拙。美惡不稱，謂之狗尾續貂；貪謀不足，謂之巴蛇吞象。

前門拒虎，後門進狼；言禍之繼至；不入虎穴，焉得虎子，言事之必成。趨利，如群蟻之附膻；愛子，如老牛之舐犢。

無中生有，何異蛇添足；進退兩難，有似抵之觸藩。杯中蛇影，自起猜疑；失馬塞翁，難分禍福。

龍駒誇陸士龍之異，鳳雛稱龐士元之奇。王猛捫虱而談世務，寧戚飯牛而取上卿。

楚王式蛙怒，以其敢死；丙吉問牛喘，恐其失時。以十人而制千虎，比事之難；走韓盧而搏騫兔，喻事之易。

有勢莫能爲，雖鞭之長，不及馬腹；制小安用大，割雞之事，焉用牛刀。食母之鳥曰鳧，食父之獸曰獍。

鶴鴒以喻弟昆，鳳凰比夫婦。腰纏騎鶴，謂富貴而登仙；瞎馬臨池，謂逼人之險語。

黔驢之技止此，鼯鼠之技易窮。強兼併者曰鯨吞，爲小賊者曰狗盜。隋珠彈雀，譬得少而失多；投鼠忌器，恐爲甲而傷乙。

事多曰蝟務，利微曰蠅頭。心惑曰狐疑，色喜曰雀躍。愛屋及烏，謂因此而惜彼；輕雞愛鶩，謂捨此而圖他。

唆惡而使爲非，教猱昇木；受恩而不知報，得魚忘筌。倚勢害人，真似城狐社鼠；空存無用，何殊陶犬瓦雞。

勢不能敵，猶螳臂之當車；人生速死，若蜉蝣之在世。以小而欲制大，越雞奚能伏鵠卵；以賤而反輕貴，鸞鳩何必笑大鵬。

蹠犬吠堯，固曰吠非其主；鵲巢鳩佔，居然安享其成。緣木求魚，極言其難得；按圖索驥，又恐其失真。

惡人藉勢，如虎之負嵎；窮人無歸，如魚之失水。九尾狐，譏其太奸。獨眼龍，誇其有勇。

指鹿爲馬，趙丞相之欺君；叱石成羊，黃初平之得道。卞莊勇能擒兩虎，高駢射可貫雙雕。

鷓鴣巢林，不過一枝；鼯鼠飲河，不過滿腹。人之所棄，有如孤雛腐鼠；人之所仰，比於起鳳騰蛟。

魚游釜中，偷生不久；燕巢幕上，棲止不安。妄自稱奇，譬如遼東之豕；所見甚小，譬之井底之蛙。

出人頭地，鶴立雞群；非偶相從，雉求牡匹。天上石麟，誇小兒之邁眾；人中騏驎，比名士之超凡。怡堂燕雀，不知後災；瓮裡醯雞，安能廣見。馬牛而襟裾，謂人之無禮義；沐猴而冠帶，謂人之不恢宏。羊質虎皮，言其有名無實；守株待兔，言其抱拙無能。

鮒魚待西江水，比人之甚窘，蛟龍非池中物，比人之有為。執牛耳，尊人主盟，附驥尾，望人汲引。

鴻雁哀鳴，悲下民之失所；狡兔三窟，譏貪夫之巧營。風馬牛勢不相干，常山蛇首尾相應。百足蟲死而不僵，千歲龜死而留骨。

大丈夫寧為雞口，毋為牛後；士君子豈甘雌伏，定要雄飛。毋局促如轅下駒，毋委靡如牛馬走。人有禮義，庶免相鼠之刺；徒能言語，何異禽獸之心。